



Broj: 01/5-50-1-6-22/08
Sarajevo, 21.10.2008.godine

Z A P I S N I K
22. sjednice Komisije za saobraćaj i komunikacije,
održane 9.10. i 21.10. 2008. godine

Sjednici su prisustvovali članovi Komisije:

1. Branko Dokić, (9. i 21.10.)
2. Šemsudin Mehmedović (9. i 21.10.)
3. Slavko Matić (9. i 21.10.)
4. Sadik Bahtić (9. i 21.10.)
5. Mehmed Suljkanović (9. i 21.10.)
6. Husein Nanić (9. i 21.10.)
7. Selim Bešlagić (9. i 21.10.)

Odsustvovali su Snježana Rajilić i Savo Erić.

Iz Radiotelevizije BiH sjednici su prisustvovali: Nikola Deretić, Marija Putica i Ahmed Žilić, članovi Upravnog odbora, Jakša Jurjević, Senada Ćumurović i Milenko Voćkić, članovi Poslovnog odbora, i Mehmed Agović, bivši generalni direktor. Sjednici je prisustvovao i sekretar Komisije za saobraćaj i komunikacije Ahmed Jalovičić.

Sjednicom je predsjedavao Branko Dokić, predsjedavajući Komisije.

Za sjednicu je predložio sljedeći

D N E V N I R E D

1. Aktuelna situacija u Radioteleviziji Bosne i Hercegovine i provođenje reforme Javnog RTV sistema u Bosni i Hercegovini;
2. Tekuća pitanja.

Dnevni red jednoglasno je usvojen.

Ad. 1. Aktuelna situacija u Radioteleviziji Bosne i Hercegovine i provođenje reforme Javnog RTV sistema u Bosni i Hercegovini

Branko Dokić podsjetio je da je na prošloj sjednici Komisije za saobraćaj i komunikacije Predstavničkog doma (u daljnjem tekstu: Komisija) zaključeno da je potrebno na ovu sjednicu pozvati sve članove

Upravnog i Poslovnog odbora Radioteleviziji Bosne i Hercegovine (u daljnjem tekstu :BHRT), te dao riječ predsjedavajućem Upravnog odbora BHRT-a (u daljnjem tekstu: Upravni odbor).

Nikola Deretić istakao je da se Upravni odbor razišao u stavovima s menadžmentom BHRT-a kada je Predstavnički dom Parlamentarne skupštine BiH zatražio da se sačini Plan konsolidacije poslovanja BHRT-a (u daljnjem tekstu: Plan konsolidacije), te da Upravni odbor nije podržao taj plan, jer nije dovoljno energičan i ne odražava stvarno stanje u BHRT-u. Upravni odbor je tada ukazao na određene probleme kojima nije posvećena potrebna pažnja, prije svega dugovanja Federalne televizije prema BHRT-u, jer je podnesena tužba za iznos od nepuna 2 miliona KM, dok za preostali iznos duga od 6 miliona KM nemaju informaciju da li je to uopće naplativo. Nezavisna revizija poslovanja BHRT-a za 2007. godinu ukazala je na ponovne nezakonitosti u provođenju procedura javnih nabavki, konstatiran je „skriveni“ gubitak u iznosu 9,2 milona KM, kao i smanjenje prihoda od marketinga za 39% u odnosu na 2006. godinu. Naveo je da se satelitski program sveo na prijenos zemaljskog programa i da je Upravni odbor u maju 2008. godine tražio od generalnog direktora da pripremi cjelovitu informaciju o satelitskom programu, ali da do danas nisu dobili odgovor. Smatra da se poslovanje BHRT-a mora postaviti na realne osnove i stoga je ključna realna finansijska konsolidacija, ali to generalni direktor nije učinio i zato je izgubio povjerenje Upravnog odbora. Nužna je pomoć Parlamentarne skupštine BiH u rješavanju problema u kojima se trenutno nalazi BHRT, jer zadržavanje postojećeg stanja može prouzrokovati još veće teškoće u daljnjem radu.

Marija Putica podsjetila je da je od samog konstituiranja Upravnog odbora do danas bilo više revizorskih izvještaja o poslovanju BHRT-a i da svi bili negativni, a da menadžment nije uspio odgovoriti krupnim problemima. Nakon revizorskog izvještaja o poslovanju za 2007. godinu u kojem su konstatirani povećani gubici, Upravni odbor bio je primoran na smjenu generalnog direktora. Ukazala je da je sadašnje stanje u BHRT-u izuzetno teško i da se bez pomoći državnih institucija neće moći prevladati.

Ahmed Žilić istakao je da je on član Upravnog odbora od februara 2008. godine i da je iznenađen načinom rada Upravnog odbora, jer se konstantno krše odredbe Ustava BiH i međunarodnog prava, a čije su osnovne vrijednosti izgradnja vladavine prava i demokratskih institucija. U radu Upravnog odbora on je, kao legalni i legitimni predstavnik Bošnjaka, konstantno preglasvan prilikom donošenja ključnih odluka, iako je članom 8. stav (1) Zakona o Javnom RTV servisu BiH propisano da BHRT u obavljanju djelatnosti i u kadrovskoj strukturi provodi relevantne ustavne odredbe u vezi s jednakim pravima konstitutivnih naroda i ostalih u Bosni i Hercegovini. Mišljenja je da je odluka o smjeni generalnog direktora donesena uz grube proceduralne propuste, navodeći da su tri člana Upravnog odbora obavili razgovor s pet kandidata za vršioca dužnosti generalnog direktora, a do o tome on uopće nije obaviješten. Također je postavio pitanje legalnosti rada člana Upravnog odbora Nade Milošević, kojoj je mandat istekao 6. septembra 2008. Neprihvatljivo je da Upravni odbor ne poštuje preporuku Komisije da stavi moratorij na odluku kojom se Mehmed Agović razrješava dužnosti generalnog direktora, kao i da se odbacuje preporuka ombudsmena za ljudska prava BiH koji je dao jasno mišljenje o nepravilnostima u proceduri smjene generalnog direktora.

Mehmed Agović ukazao je da je Poslovni odbor BHRT-a na sjednici održanoj nakon 32. sjednice Upravnog odbora jednoglasno ocijenio da su odluke Upravnog odbora sa te sjednice nelegalne i neligitime, te ih je u potpunosti odbacio. Stoga Poslovni odbor traži od Parlamentarne skupštine BiH i nadležnih međunarodnih asocijacija da daju ocjenu o načinu rada Upravnog odbora, jer BHRT u ovakvim okolnostima ne može dalje funkcionirati. Smatra da se mora osigurati institucionalna samostalnost i uređivačka nezavisnost BHRT-a kao javnog servisa, dok je potpuno suprotan stav dijela Upravnog odbora. Rad BHRT-a je ugrožen i zbog političkih pritisaka i otvorenih zahtjeva establišmenta iz Republike Srpske za prestanak rada BHRT-a. Upravni odbor nije prihvatao prijedloge Poslovnog odbora da je potrebno odgovoriti na zahtjeve za gašenjem BHRT-a, jer se Upravni odbor ne bavi suštinskim pitanjima kao što je reforma Javnog RTV sistema BiH, nego pitanjem naknada za rad u Upravnom odboru. Poslovni odbor je od stupanja na dužnost učinio sve da zaustavi rast dugovanja, da racionalizira troškove, te da se osiguraju sredstva za investiranje i učini bilo kakav pomak u radu, unatoč stalnom nedostatku novca. Problemi sa satelitskim programom iskorišteni su kao sredstvo pritiska na Poslovni odbor, iako je Upravni odbor upoznat s dopisom Ministarstva komunikacija i prometa BiH da su osigurana sredstva za satelitski program

za 2007. i 2008. godinu. Naglasio je da je Poslovodni odbor postupio prema svim preporukama Ureda za reviziju institucija BiH u vezi s poslovanjem BHRT-a za 2005. i 2006. godinu. Smatra da je jedan od uzroka sadašnje ozbiljne situacije u BHRT-u i odgađanje potpune primjene Zakona o Javnom RTV sistemu BiH, što je prouzokovalo negativne posljedice na ukupno poslovanje BHRT-a, koje su najizraženije u domenu raspodjele finansijskih prihoda od RTV takse i marketinga, kao i nemogućnosti uspostavljanja funkcionalne organizacije BHRT-a u skladu s njenim Statutom i Zakonom o Javnom RTV servisu BiH.

Jakša Jurjević istakao je da je 16. septembra 2008. imenovan za vršioca dužnosti generalnog direktora i da je tek od prošle sedmice u mogućnosti da obavlja svoje poslove. U predstojećem periodu, do imenovanja novog generalnog direktora, učinit će sve što je u njegovoj moći po pitanju rješavanja tekućeg poslovanja, ali je logično da se u tako kratkom periodu ne mogu očekivati neke krupnije promjene. Uzimajući u obzir složenost situacije, smatra da je BHRT-u neophodna pomoć države.

Milenko Vočkić rekao je da, ako se ne razmotre neka krupna pitanja u realizaciji programa i programske politike, Televizija Bosne i Hercegovine (u daljnjem tekstu: BHT1), ubuduće neće moći da ispunjava svoje zadatke. Naveo je da menadžment ima problema pri organizaciji i pravljenju programa, prije sveg zbog činjenice da se za realizaciju programa čiji troškovi iznose više od 10 hiljada KM mora tražiti odobrenje Upravnog odbora, pa tako ispada da program uređuje Upravni odbor, a ne urednici. Ukazao je da je nakon provedene konkursne procedure za urednika informativnog programa, koja je provedena u skladu s propisima, Upravni odbor ne samo odbio potvrditi ovo imenovanje, nego je još tražio da se raspišu konkursi i za ostale urednike, iako je on kao direktor zadovoljan njihovim radom. S obzirom na navedeno, teško se može govoriti o samostalnosti menadžmenta u radu. Istakao je da u BHT1 ima 118 zaposlenih, i to 49% Bošnjaka, 18% Srba, 15 % Hrvata i 18% ostalih, te da je uredništvo nacionalno izbalansirano.

Senada Čumurović istakla je da je BH radiol formiran 2001. godine i da je u prve četiri godine bio najslušaniji radio u Bosni i Hercegovini, a da sad, nažalost, nije. Jedan od raloga za ovakvu situaciju jesu uslovi rada, pošto su, prije svega, fokusurani na svakodnevne probleme, tako da zbog nedostatka finansija ostaje malo prostora za nove izazove. Navela je da u BH radiju 1 ima 68 zaposlenih, i to 9 % Hrvata, 18% Srba, 51% Bošnjaka i 22% ostalih, te da je uredništvo nacionalno izbalansirano.

Sadik Bahtić ukazao je da je izuzetno teška situacija u BHRT-u, za koju je, prema njegovom mišljenju, najodgovorniji Upravni odbor. Smatra da je BHRT-u neophodna pomoć državnih institucija u prevazilaženju problema u poslovanju, kao i da je potrebno što prije izvršiti reformu Javnog RTV sistema BiH. Istakao je da će u raspravi predložiti da Komisija usvoji određene zaključke koji će se dostaviti Predstavničkom domu.

Slavko Matić istakao je da se kao čovjek i kao pripadnik hrvatskog naroda u načelu slaže sa stavovima gospodina Žilića i da ne treba dolaziti do preglasavanja naroda, ali da se preglasavanje ne treba odnositi samo na Upravni odbor, jer je od usvajanja Dejtonskog sporazuma hrvatski narod konstantno preglasavan na svim nivoima u Bosni i Hercegovini. Zakon o Javnom RTV servisu BiH donesen je bez glasova predstavnika hrvatskog naroda, te podsjetio da su predstavnici hrvatskog naroda prilikom donošenja ovog zakona tražili drugačiji način rada Upravnog odbora. S obzirom da je ovim zakonom predviđeno da se sve odluke Upravnog odbora mogu donositi sa tri glasa "za", smatra da je odluka o razrješenju generalnog direktora i legalna i legitimna. Zaključci koji su usvojeni na prošloj sjednici Komisije i odnose se na rad BHRT-a doneseni u suprotnosti s Poslovnikom Predstavničkog doma, jer se radilo o zaključcima o kojima se nije izjašnjavao Predstavnički dom i za koji su glasali samo Bošnjaci, a trebalo je odlučivati po posebnoj proceduri predviđenoj Poslovnikom Doma.

Selim Bešliagić smatra da u formalnom smislu nije ispravno proveden postupak smjene generalnog direktora i da imamo jasan stav ombudsmena za ljudska prava BiH kako nije ispoštavana predviđena procedura, ne ulazeći u to da li postoje razlozi za smjenu. Postavlja se pitanje i odgovornosti Upravnog odbora za ovakvo stanje u BHRT-u, te naglasio da Upravni odbor ne može očekivati od Parlamentarne skupštine BiH da rješava probleme u poslovanju BHRT-a.

Husein Nanić rekao je kako smatra da je teško u ovom trenutku predložiti neke zaključke koji bi pomogli da se nađe izlaz iz ovakve situacije. Upravni odbor traži pomoć od Parlamentarne skupštine BiH, a kada je Komisija preporučila da stave moratorij na odluku o smjeni generalnog direktora, ta preporuka je odbijena. Istovremeno imamo i preporuku ombudsmena za ljudska prava BiH da je bilo kršenja procedure prilikom donošenja odluke o smjeni generalnog direktora, pa se ne prihvata i stav ombudsmena. Ovakav način rada Upravnog odbora stvara smao daljnju konfuziju, a naglasio je da se u Upravnom odboru konstatno preglašava predstavnik bošnjačkog naroda. Mišljenja je da bi u budžetu institucija BiH za 2009. godinu trebalo planirati sredstva za konsolidaciju BHRT-a, jer imamo slučajeve da u sadašnjoj finansijskoj krizi države pomažu privatne banke, pa zašto se onda ne bi pružila finansijska pomoć državnoj televiziji.

Mehmed Suljkanović istakao je da su sukobi između Upravnog odbora i menadžmenta počeli prije više od godinu dana, kada je predsjedavajući Upravnog odbora uputio dopis Parlamentarnoj skupštini BiH u kojem predlaže smjenu generalnog direktora. Osim što za trenutnu situaciju BHRT-u snosi najveću odgovornost, Upravni odbor odgovoran je i za neprovođenje reforme Javnog RTV sistema BiH, prije svega formiranje Korporacije javnih RTV servisa BiH. Smatra da je potrebno izvršiti izmjene Zakona o Javnom RTV servisu BiH, prije svega odredbi koje sa odnose na sastav i način rada Upravnog odbora.

Šemsudin Mehmedović smatra da je donošenjem odluke kojom se za svaki program čiji troškovi iznose više od 10 hiljada KM mora tražiti odobrenje Upravnog odbora omogućeno da se Upravni odbor direktno miješa u uređivačku politiku. Upravni odbor nije podržao Plan konsolidacije koji je predložio menadžment s obrazloženjem da nije dovoljno energičan, bez konkretne primjedbe šta mu nedostaje. U obrazloženju odluke o smjeni generalnog direktora nisu tačni podaci o povećanju dugovanja BHRT-a, jer je u revizorskom izvještaju za 2007. godinu jasno naznačeno da su smanjena dugovanja. Smatra da bi prijedlozima zaključaka Komisije prema Predstavničkom domu trebalo utvrditi precizne rokove za uspostavu Javnog RTV sistema BiH i inicirati izmjene Zakona o Javnom RTV servisu BiH, a da se dotada ovaj zakon u potpunosti provodi.

Branko Dokić istakao je da je izuzetno složeno stanje u BHRT-u, da je menadžment naslijedio znatne probleme koje otežavaju poslovanje, ali da sada treba ići u pravcu rješavanja poteškoća i boljeg funkcioniranja BHRT-a. Naglasio je da je nedavnim stupanjem na snagu Zakona o Javnom RTV servisu Federacije BiH ispunjena i preostala zakonska pretpostavka za formiranje Korporacije javnih RTV servisa BiH. Smatra da nije dobro da se u Upravnom odboru preglašava predstavnik jednog naroda, ali da je nužno primjenjivati postojeće zakone koje se odnose na oblast javnog emitiranja, te da bi trebalo formirati nezavisnu grupu eksperata koji će uraditi procjenu uskađenosti Zakona o javnom RTV sistemu BiH i Zakona o Javnom RTV servisu BiH s evropskim standardima, te da se na osnovu te procjene sačini prijedlog za eventualne izmjene i dopune ovih zakona.

Nikola Deretić ukazao je da je, iako dužan provoditi odluke Upravnog odbora, Mehmed Agović uzeo sebi za pravo da stavi van snage odluku o Upravnom odboru donesenu u decembru 2007. godine, a koja se odnosi na naknade za rad u Upravnom odboru BHRT-a i Upravnom odboru Javnog RTV sistema BiH, a da pritom nije tražio tumačenje odluke od Parlamentarne skupštine BiH ili Ministarstva komunikacija i prometa BiH, pa je Upravni odbor bio primoran tražiti tumačenje ove odluke. Upravni odbor je, u skladu sa Zakonom o javnim preduzećima, donio odluku da se za program čiji troškovi iznose više od 10 hiljada KM mora imati odobrenje Upravnog odbora, a menadžment je ospravao čak i da je BHRT javno preduzeće. Izvještaj generalnog direktora o finansijskom poslovanju BHRT-a za 2007. godinu nije prihvaćen, jer ne prikazuje realno stanje i u suprotnosti je s podacima navedenim u revizorskom izvještaju za 2007. godinu. Istakao je da će Upravni odbor i ubuduće smijeniti svakog generalnog direktora koji se stavi iznad Upravnog odbora

Ahmed Žilić istakao je da, uzimajući u obzir činjenicu da se u Upravnom odboru stalno preglašava pripadnik jednog konstitutivnog naroda, predlaže da Komisija uputi zaključak prema Predstavničkom domu kojim bi se tražilo da Upravni odbor izvrši izmjene odredbi Statuta i Poslovnika o radu BHRT-a, na način da one usklade s odredbama Ustava BiH i međunarodnog prava. To se odnosi na postupak usvajanja izvještaja o finansijskom poslovanju, imenovanje i razrješenje generalnog direktora, davanje saglasnosti na imenovanja urednika i usvajanje programskih planova. Naglasio da se protivi povećanju naknada članovima

Upravnog odbora za rad u Upravnom odboru Javnog RTV sistema BiH, jer je nemoralno da se plaća za rad Upravnog odbora koji ne funkcioniše.

Marija Putica ukazala je da je Zakonom o Javnom RTV servisu Upravni odbor odgovoran za poslovanje BHRT-a, te da će, ako i sljedeći generalni direktor ne bude uspio odgovoriti svojim zadacima, prva tražiti i njegovo razrješenje. Mišljenja je da najveću krivicu za lošu saradnju između BHRT-a i entitetskih javnih emitera snosi generalni direktor BHRT-a.

Mehmed Agović smatra da Upravni odbor proizvoljno tumači Zakon o Javnom RTV servisu BiH i da je zbog toga usvojio takav Statut BHRT-a koji je u suprotnosti s relevantnim evropskim normama. Postavio je pitanje kako se upće može govoriti o uređivačkoj samostalnosti kada Upravni odbor mora dati saglasnost za program čiji troškovi iznose više od 10 hiljada KM. Upravni odbor poništio je konkurs za imenovanje urednika, koji je u potpunosti proveden u skladu sa zakonom. Što se tiče saradnje s entitetskim emiterima, istakao da, uprkos nastojanjima BHRT-a za saradnjom, nisu dobili njihovu podršku, naročito od Radiotelevizije Republike Srpske. Istakao je da je krajnje vrijeme da se završi reforma Javnog RTV sistema BiH i da je to u interesu svih javnih emitera.

Nakon rasprave o ovoj tački, Komisija je jednoglasno odlučila da se sjednica prekine, a da se u nastavku sjednice razmatraju zaključci koji će biti dostavljeni Predstavničkom domu na usvajanje.

Na nastavku sjednice, Komisija je usvojila zaključke koje upućuje Predstavničkom domu na usvajanje:

1. Predstavnički dom Parlamentarne skupštine BiH traži od Upravnog odbora BHRT-a da realizira sve zaključke sa 32. sjednice Predstavničkog doma, održane 9.7. i 14.7. 2008., donesene povodom rasprave o tački: Poslovanje Javnog RTV servisa BiH i mjere za prevladavanje stanja utvrđenog revizorskim izvještajima o finansijskom poslovanju Javnog RTV servisa BiH za 2005. i 2006. godinu.

(predlagač: poslanik Branko Dokić, zaključak je usvojen jednoglasno)

2. Predstavnički dom Parlamentarne skupštine BiH traži od Upravnog i Poslovnog odbora BHRT-a da sačine sanacioni program i program razvoja BHRT-a za 2009. godinu i dostave ih Parlamentarnoj skupštini BiH prije razmatranja Prijedloga budžeta institucija BiH za 2009. godinu.

(predlagač: poslanik Selim Bešlić, zaključak je usvojen jednoglasno)

3. Predstavnički dom Parlamentarne skupštine BiH sugerira članovima Upravnog odbora BHRT-a da u njegovom funkcioniranju, osim Zakona o Javnom RTV sistemu BiH i Zakona o Javnom RTV servisu BiH, direktno primjenjuju i odredbe Ustava BiH, međunarodnih ugovora o ljudskim pravima koji su sastavni dio Ustava BiH, međunarodnog prava, Preporuku br. R (96) 10 Komiteta ministara Parlamentarne skupštine Vijeća Evrope kojom se garantira nezavisnost javnih emitera, usvojenu 11.9.1996., s pravnom snagom iznad domaćeg zakonodavstva, kao i drugog *soft law* međunarodnog prava u skladu s članom 11. stav (2) Zakona o Javnom RTV servisu BiH. (predlagač: poslanik Sadik Bahtić, zaključak je usvojen jednoglasno)

4. Predstavnički dom Parlamentarne skupštine BiH predlaže Upravnom odboru BHRT-a da, ako pojedine odredbe Statuta i Poslovnika o radu BHRT-a nisu u skladu s odredbama Ustava BiH i međunarodnog prava, izvrši njihovo usaglašavanje. (predlagač: poslanik Sadik Bahtić, zaključak je usvojen jednoglasno)

5. Komisija smatra da je, u nelegalnoj proceduri, donesena odluka Upravnog odbora BHRT-a o smjeni generalnog direktora Mehmeda Agovića na 32. sjednici Upravnog odbora, održanoj 12.9.2008. (odluka br. 4110-37/91, od 15.9.2008.), zbog grubog kršenja procedure i principa vladavine prava, a time i Ustava BiH i Evropske konvencije o ljudskim pravima i međunarodnih ugovora, a što je potvrdio Ombudsmen BiH u svojim preporukama, od 29.9.2008., te predlaže Predstavničkom domu da naloži Upravnom odboru postupanje u skladu s navedenim aktima.

S tim u vezi, Komisija predlaže da Upravni odbor stavi van snage Odluku o imenovanju vršioca dužnosti generalnog direktora BHRT-a, broj: 4110-37/92, od 15.9.2008.

(predlagač: poslanik Sadik Bahtić, zaključak je usvojen s pet glasova „za“ i dva glasa „protiv“).

6. Komisija predlaže Predstavničkom domu Parlamentarne skupštine BiH da se utvrdi odgovornost članova Upravnog odbora BHRT-a zbog:

- nepoštivanja Zakona o Javnom RTV servisu BiH član 29. stav (1) tač. b), c), d), j) i k);
- kršenja procedura;
- nepoštivanja Ustava BiH i Evropske konvencije o ljudskim pravima i međunarodnog prava;
- neprovođenja zaključaka Predstavničkog doma PSBiH sa 32. sjednice;
- zbog ukupnog stanja u ovom javnom servisu.

(predlagač: poslanik Sadik Bahtić, zaključak je usvojen s četiri glasa „za“, dva „protiv“ i jednim „suzdržanim“).

7. Predstavnički dom Parlamentarne skupštine BiH traži od Vijeća ministara BiH da osnuje radnu grupu u kojoj bi bili eksperti iz oblasti javnog emitiranja, sa zadatkom da urade procjenu uskađenosti Zakona o javnom RTV sistemu BiH i Zakona o Javnom RTV servisu BiH sa Ustavom BiH i evropskim standardima iz ove oblasti, te da se na osnovu toga sačini prijedlog za eventualne izmjene i dopune ovih zakona.

(predlagač: poslanik Branko Dokić, zaključak je usvojen jednoglasno)

8. Predstavnički dom Parlamentarne skupštine BiH traži od Upravnog odbora BHRT-a da u što kraćem roku dostavi Parlamentarnoj skupštini BiH izvještaj o radu i poslovanju BHRT-a u 2007. godini, u skladu s članom 29. stav (1) tačka k) Zakona o Javnom RTV servisu BiH.

(predlagač: poslanik Branko Dokić, zaključak je usvojen s pet glasova „za“, jednim „protiv“ i jednim „suzdržanim“).

Komisija je također u okviru ove tačke dnevnog reda usvojila i sljedeće zaključke:

1. Članom 8. stav (1) Zakona o Javnom RTV servisu BiH („Službeni glasnik BiH“, br. 92/05) predviđeno je da BHRT u obavljanju djelatnosti i u kadrovskoj strukturi provodi relevantne ustavne odredbe u vezi s jednakim pravima konstitutivnih naroda i ostalih u Bosni i Hercegovini, a članom 25. stav (3) propisano je da Upravni odbor BHRT-a ima četiri člana i to po jednog iz svakog konstitutivnog naroda i iz reda ostalih.

Uzimajući u obzir navedeno, kao i činjenicu da je prilikom donošenja ključnih odluka Upravnog odbora BHRT-a omogućeno preglasavanje legitimnog predstavnika jednog konstitutivnog naroda, Komisija traži od Ustavopravne komisije Predstavničkog doma mišljenje da li je u skladu sa Ustavom BiH odredba člana 27. stav (2) Zakona o Javnom RTV servisu BiH koja glasi

„Član 27.

(Kvorum i odlučivanje Upravnog odbora)

(2) Za imenovanje i razrješenje generalnog direktora, usvajanje programskih planova radija i televizije, kao i za donošenje finansijskih planova i godišnjeg budžeta, potrebni su glasovi najmanje tri člana Upravnog odbora.“ (predlagač: poslanik Selim Bešlić, zaključak je usvojen jednoglasno)

2. Traži se od ombudsmena za ljudska prava BiH tumačenje da li je preporuka ombudsmena Safeta Pašića, od 29.9.2008., u vezi s odlukama s 32. sjednice Upravnog odbora BHRT-a, zvaničan stav Institucije ili je to lični stav ombudsmena Safeta Pašića.

(predlagač: poslanik Branko Dokić, zaključak je usvojen s pet glasova „za“, jednim „protiv“ i jednim „suzdržanim“).

U smislu odredbi člana 39. i 113. Poslovnika Predstavničkog doma Parlamentarne skupštine BiH, za izvjestioca u plenarnoj fazi imenovan je predsjedavajući Komisije Branko Dokić.

Ad. 2. Tekuća pitanja

Branko Dokić upoznao je prisutne da je Vijeće za regionalnu saradnju (RCC) uputilo prijedlog Parlamentarnoj skupštini BiH da se, u saradnji s nadležnom komisijom Parlamentarne skupštine BiH, organizira Radionica za parlamentarce Jugoistočne Evrope o temi: "Podrška parlamentarnata harmoniziranim reformama energetskeg sektora", koja će biti održana u Sarajevu, u prvoj polovini decembra 2008. godine.

Komisija je jednoglasno prihvatila prijedlog Vijeća za regionalnu saradnju (RCC) da bude koorganizator pomenute radionice.

Prvi dio sjednice održan je 9.10.2008., u vremenu od 11,15 do 15,45 sati. Nastavak sjednice održan je 21.10.2008., u vremenu od 9,15 do 9,30 sati.

SEKRETAR KOMISIJE
Ahmed Jalovičić

PREDSJEDAVAJUĆI KOMISIJE
dr. Branko Dokić